

七十二家集

隋煬帝集卷之三

隋煬帝楊廣著

詔

親征高麗詔

天地大德降繁霜於秋令聖哲至仁著甲兵於
刑典故知造化之有肅殺義在無私帝王之用
干戈蓋非獲已版泉丹浦莫匪龔行取亂覆昏
咸由順動況乎甘野誓師夏開成大禹之業商
郊問罪周發成文王之志永監前載屬當朕躬

粵我有隋誕膺靈命兼三才而建極一六合而
爲家提封所漸細柳盤桃之外聲敎爰暨紫舌
黃枝之域遠至邇安罔不和會功成治定於是
乎在而高麗小醜迷昏不恭崇聚勃碣之間薦
食遼穢之境雖復漢魏誅戮巢窟暫傾亂離多
阻種落還集萃川藪於往代播實繁以迄今睠
彼華壤翦爲夷類歷年永久惡稔旣盈天道禍
淫亾徵已兆亂常敗德非可勝圖掩慝懷姦惟
日不足移告之嚴未嘗面受朝覲之禮莫肯躬

親誘納亾叛不知紀極克斥邊陲亟勞烽候關
柝以之不靜生人爲之廢業在昔薄伐已漏天
網旣緩前禽之戮未卽後服之誅曾不懷恩翻
爲長惡乃兼契丹之黨虔劉海戍習韃靼之服
侵軼遼西又青丘之表咸修職貢碧海之濱同
稟正朔遂復攸攘琛賫遏絕往來虐及弗辜誠
而遇禍輜軒奉使爰暨海東旌節所次途經藩
境而擁塞道路拒絕王人無事君之心豈爲臣
之禮此而可忍孰不可容且法令苛酷賦歛煩

重強臣豪族咸執國鈞朋黨比周以之成俗賄
貨如市冤枉莫申重以仍歲灾凶比屋饑饉兵
戈不息徭役無期力竭轉輸身填溝壑百姓愁
苦爰誰適從境內哀惶不勝其弊迴首面內各
懷性命之圖黃髮稚齒咸興酷毒之歎省俗觀
風爰屆幽朔弔人間罪無俟再駕於是親總六
師用申九伐拯厥貼危協從天意殄茲逋穢克
嗣先謨今宜授律啓行分麾屆路掩渤海而雷
震歷夫餘以電掃比戈按甲誓旅而後行三令

五申必勝而後戰左第一軍可鏤方道第二軍
可長岑道第三軍可海冥道第四軍可蓋馬道
第五軍可建安道第六軍可南蘇道第七軍可
遼東道第八軍可玄菟道第九軍可扶餘道第
十軍可朝鮮道第十一軍可沃沮道第十二軍
可樂浪道右第一軍可黏蟬道第二軍可含資
道第三軍可渾彌道第四軍可臨屯道第五軍
可候城道第六軍可提奚道第七軍可踏頓道
第八軍可肅慎道第九軍可碣石道第十軍可

東曉道第十一軍可帶方道第十二軍可襄平
道凡此衆軍先奉廟畧絡繹引途總集平壤莫
非如豺如貔之勇百戰百勝之雄顧盼則山岳
傾頽叱吒則風雲騰鬱心德攸同爪牙斯在朕
躬馭元戎爲其節度涉遼而東循海之右解倒
懸於遐裔問疾苦於遺黎其外輟齋遊闕隨機
赴響卷甲銜枚出其不意又滄海道軍升艦千
里高颿電逝巨艦雲飛橫斷沮江逕造平壤島
嶼之望斯絕坎井之路已窮其餘被髮左衽之

人控弦待發微盧彭濮之旅不謀同辭杖順臨
逆人百其勇以此衆戰勢等摧枯然則王者之
師義存止殺聖人之教必也勝殘天罰有罪本
在元惡人之多僻脇從罔治若高元泥首轅門
自歸司寇卽宜解縛焚櫬弘之以恩其餘臣人
歸朝奉順咸加慰撫各安生業隨才任用無隔
夷夏營壘所次務在整肅芻蕘有禁秋毫勿犯
布以恩宥諭以禍福若其同惡相濟抗拒官軍
國有常刑俾無遺類明加曉示稱朕意焉

再伐高麗詔

黃帝五十二戰成湯二十七征方乃德施諸侯
令行天下盧芳小盜漢祖尚且親征隗囂餘燼
光武猶自登隴豈不欲除暴止戈勞而後逸者
哉朕纂成寶業君臨天下日月所照風雨所沾
孰非我臣獨隔聲教叢爾高麗僻居荒表鴟張
狼噬侮慢不恭抄竊我邊陲侵軼我城鎮是以
去歲出軍問罪遼碣殪長蛇於玄菟戮封豕於
襄平扶餘衆軍風馳電逝追奔逐北徑踰沮水

滄海舟楫衝賊腹心焚其城郭汙其宮室高元
伏鎖泥首送款軍門尋請入朝歸罪司寇朕以
許其改過乃詔班師而長惡不悛宴安鴆毒此
而可忍孰不可容便可分命六師百道俱進朕
當親執武節臨御諸軍秣馬丸都觀兵遼水順
天誅於海外救窮民於倒懸征伐以正之明德
以誅之止除元惡餘無所問若有識存亡之分
悟安危之機翻然北首自求多福必其同惡相
濟抗拒王師若火燎原刑茲無赦有司便宜宣

布咸使聞知

勞楊素手詔

我有隋之御天下也于今二十有四年雖復外
夷侵叛而內難不作修文偃武四海晏然朕以
不天銜恤在疚號天叩地無所建及朕本以藩
王謬膺儲兩復以庸虛纂承洪業天下者先皇
之天下也所以戰戰兢兢弗敢失墜況復神器
之重生民之大哉賊諒苞藏禍心自幼而長羊
質獸心假託名譽不奉國諱先圖叛逆違君父
之命成莫大之罪誑惑良善委任奸回稱兵內

侮毒流百姓私假署置擅用謀戮小加大少陵
長民怨神怒衆叛親離爲惡不同同歸於亂朕
寡兄弟猶未忍及言是故開關門而待寇戢干
戈而不發朕聞之天生蒸民爲之置君仰惟先
旨每以子民爲念朕豈得枕伏苫廬顛而不救
也夫義滅親春秋高義周旦乃誅二叔漢啓乃
戮七藩義在茲乎事不獲已是以授公戎律問
罪太原且逆子賊臣何代不有豈意今者近出
家國所歎荼毒甫爾便及此事由朕不能和兄

弟不能安蒼生德澤未弘兵戈先動賊亂者止
一人塗炭者乃衆庶非惟寅畏天威亦乃孤負
付囑薄德厚耻愧乎天下公乃先朝功臣勲庸
克茂至如皇基草創百物惟便始匹馬歸朝誠
識兼至汴部鄭州風卷秋籜荆南塞北若火燎
原早建殊勲夙著誠節及獻替朝端具瞻惟允
爰弼朕躬以濟時難昔周勃霍光無以加也賊
乃竊據蒲州關梁斷絕公以少擊衆捐期平殄
高鉉據嶮抗拒官軍公以深謀出其不意霧廓

雲除冰消瓦解長驅北邁直趣巢窟晉陽之南
蟻徒數萬諒不量力欲猶舉斧公以稜威外討
發憤於內忘身殉義親當矢石兵刃斃交魚潰
烏散僵屍蔽野積甲若山諒遂守窮城以拒鉞
鉞公董率驍勇四面攻圍使其欲戰不敢求走
無路智力俱盡而縛軍門斬將奪旗伐叛柔服
元惡旣除東夏清晏嘉庸茂績於是乎在昔武
安平趙淮陰定齊豈若公遠而不勞速而克捷
者也朕殷憂諒闇不得親御六軍未能問道於

上庠遂使劬勞於行陣言念於此無忘寢食公
乃建異世之元勲執一心之確志古人有言曰
疾風知勁草世亂有誠臣公得之矣方乃銘之
常鼎豈止書勲竹帛哉功績克諧哽歎無已稍
冷公如宜軍旅務殷殊當勞慮故遣公弟指宣
往懷迷塞不次

楊素謝表附

臣自惟虛薄志不及遠州郡之職敢憚劬勞
卿相之榮無階覬望然時逢昌運王業惟始

雖涓流赴海誠心屢竭輕塵積岳功力蓋微
徒以南陽里閭豐沛子弟高位重爵榮顯一
時遂復入處朝端出總戎律受文武之任預
帷幄之謀豈臣才能實由恩澤欲報之德義
極昊天伏惟陛下照重離之明養繼天之德
牧臣於踈遠照臣以光暉南服降枉道之書
春官奉肅成之旨然草木無識尚榮枯候時
況臣有心實自効無路晝夜迴徨寢食慙惕
常懼朝露奄至虛負聖慈賊諒包藏禍心有

自來矣因幸國哀便肆凶逆興兵晉代搖蕩
山東陛下拔臣於凡流授臣以戎律蒙心膂
之寄稟平亂之規蕭王赤心人皆以死漢皇
大度天下爭歸妖寇廓清豈臣之力由蒙使
臣弟約齋詔書問勞高音峻筆有若天臨洪
恩大澤便同海運悲欣慙懼五情振越雖百
隕微軀無以一報

爲楊素立碑詔

夫銘功藝器紀德豐碑所以垂名迹於不朽樹
風聲於沒世故楚景武公素茂績元勲劬勞王
室竭盡誠節叶贊朕躬故以道邁三傑功叅十
亂未臻遐壽遽戢清徽春秋遞代方綿歲祀式
播雕篆用圖勲德可立碑宰隨以彰盛美

手詔史祥

昔歲勞公問罪河朔賊爾日塞兩關之路據倉
阻河百姓脇從人亦衆矣公竭誠奮勇一舉尅
定詩不云乎喪亂旣平旣安且寧非英才大畧
其孰能與於此邪故聊示所懷亦何謝也

褒樊子蓋詔

子蓋爲武威太守以善政聞大業三年入朝帝引之內殿特蒙褒美乃下詔

設官之道必在用賢安人之術莫如善政龔汲振德化於前張杜垂清風於後共治天下實資良守子蓋幹局通敏操履清潔自剖符四服愛惠爲先撫道有方寬猛得所處腴膏不潤其質酌貪泉豈渝其性故能治績克彰課最之首凡厥在位莫匪王臣若能人思奉職各展其効朕將冕旒垂拱何憂不治哉

詔樊子蓋

卿夙懷恭順深執誠心聞朕西巡欣然望幸丹
款之至甚有可嘉宜保此純誠克終其美

又褒樊子蓋詔

車駕西巡子蓋獻青木香以禦霧露及帝還謂之曰人道公清定如此不子蓋謝曰臣安敢言清止是小心不敢納

响耳賜口味百餘斛又下詔

導德齊禮寔惟共治懲惡勸善用明黜陟朕親巡河右觀省人風所歷郡縣訪採治績罕遵法度多蹈刑網而金紫光祿大夫武威太守樊子蓋執操清潔處湮不渝立身雅正臨人以簡威惠兼舉寬猛相資故能畏而望之不嚴斯治實字人之盛績有國之良臣宜加褒顯以弘獎勵

可右光祿大夫太守如故賜縑千疋粟麥二千斛

加蘇威開府儀同三司詔

玉以潔潤丹紫莫能淪其質松表歲寒霜雪莫
能凋其采可謂溫仁勁直性之然乎房公威器
懷溫裕誠量弘雅早居端揆備悉國章先皇舊
臣朝之宿齒棟梁社稷彌諧朕躬守文奉法卑
身率禮昔漢之三傑輔惠帝者蕭何周之十亂
佐成王者邵奭國之寶器其在得賢叅燮台階
具瞻斯允雖復事藉論道終期獻替銓衡時務
朝寄爲重可開府儀同三司餘並如故

以衛玄爲光祿大夫詔

近者妖氛充斥擾動關河文并率勵義勇應機
響赴表裏奮擊摧破兇醜空升榮命式弘賞典
可右光祿大夫

贈劉方上柱國盧國公詔

方肅承廟畧恭行天討飲冰遄邁視險若夷摧
鋒直指出其不意鯨鯢盡殪巢穴咸傾役不再
勞肅清海外致身王事誠績可嘉可贈上柱國
盧國公

贈豆盧毓大將軍詔

褒顯名節有國通規加等節終抑推令典毓深
識大義不顧姻親出於萬死首建奇策去逆歸
順殉義亾身追加榮命宜優恒禮可贈大將軍
封正義縣公賜帛二千疋謚曰愍

改封豆盧毓雍丘侯詔

故大將軍正義愍公毓臨節能固捐生殉國成
爲令典沒世不忘象賢無墜德隆必祀改封雍
丘愍侯復以願師承襲

追贈獨孤施詒

外氏衰禍獨孤施不幸早世遷卜有期言念渭
陽之情追懷傷切宜加禮命允備哀榮可贈正
議大夫

又

舅氏之尊戚屬斯重而降年弗永凋落相繼緬
惟先往宜崇徽秩復贈銀青光祿大夫

責蘇威詔

威立性朋黨好爲異端懷挾詭道徼幸名利詆訶律令謗訕臺省昔歲薄伐奉述先志凡預切問各盡胸臆而威不以開懷遂無對命啓沃之道其若是乎資敬之義何其甚薄

徙衛王集騰王綸詔

綸集以附萼之華猶子之重縻之好爵匪由德
進正應與國升降休戚是同乃包藏妖禍誕縱
邪僻在三之義愛敬俱淪急難之情孔懷頓滅
公卿議旣如此覽以潛然雖復王法無私恩從
義斷但法隱公族禮有親親致之極詳情所未
忍可除名爲民遠徙邊郡

優突厥詔

突厥意利珍豆啓民可汗率領部落保附關塞
遵奉朝化思改戎俗頻入謁覲屢有陳請以旃
牆毳幕事窮荒陋上棟下宇願同北屋誠心懇
切朕之所重宜於萬壽戎置城造屋其帷帳牀
褥已上隨事量給務從優厚稱朕意焉

答議突厥改服詔

突厥啓民表請乞依華夏服飾公卿請依所表帝以爲不可乃下詔

先王建國夷夏殊風君子教民不求變俗斷髮
文身咸安其性旃裘卉服各尚所宜因而利之
其道弘矣何必化諸削任縻以長纓豈遂性之
至理非包含之遠度衣服不同旣辨要荒之敘
庶類區別彌見天地之情

賜啓民位侯王上詔

德合天地覆載所以弗遺功格區寓聲教所以
咸洎至於梯山航海請受正朔襲冠解辮同彼
臣民是故王會納貢義彰前冊呼韓入臣待以
殊禮突厥意利珍寶啓民可汙志懷沈毅世修
藩職往者挺身違難拔足歸仁先朝嘉此款誠
授以徽號資其甲兵之衆收其破滅之餘復祀
於旣亡之國繼絕於不存之地斯固施均亭育
澤漸要荒者矣朕以薄德祇奉靈命思播遠猷

光融令緒是以親巡朔野撫寧藩服啓民深委
誠心人奉朝覲率其種落拜首軒墀言念丹款
良以嘉尚宜隆榮數式優恒典可賜路車乘馬
鼓吹幡旗贊拜不名位在諸侯王上

與高昌國王詔

彰德嘉善聖哲所隆顯誠遂良典謨貽則光祿
大夫弁國公高昌王伯雅識量經遠器懷溫裕
丹款夙著亮節遐宣本自諸華歷祚西壤昔因
多難淪迫僮戎數窮毀冕翦爲胡服自我皇隋
平一宇宙化偃九閩德加四表伯雅踰沙忘阻
奉賚來庭觀禮容于舊章慕威儀之盛典於是
襲纓解辮削衽曳裾變夷從夏義光前載可賜
衣冠之具仍班製造之式并遣使人部領將送

被以采章復見車服之美乘彼氍毹還爲冠帶
之國

隋煬帝集卷之四

隋煬帝楊廣著

勅

宣齊王勅

帝拜柳謩之爲齊王長史帝法服臨軒命齊王立朝堂之前遣牛弘等引謩之詣齊王所西面立宣勅謂王

我昔階緣恩寵啓封晉陽出藩之初時年十二先帝立我於西朝堂乃令高類虞慶則元旻等從內送王子相於我于時誠我曰以汝幼冲未

更世事今令子相作輔於汝事無大小皆可委
之無得近昵小人疎遠子相若從我言者有益
於社稷成立汝名行如有不用此言唯國及身
敗無日矣吾受勅之後奉以周旋不敢失墜微
子相之力吾無今日矣若與寒之從事一如子
相也

與柳謩之勅

今以卿作輔於齊善思匡救之理副朕所望若
齊王德業修備富貴自當鍾卿一門若有不善
罪亦相及

勅度四十九人法名

皇帝勅皇帝敬問括州國清寺沙門智越法師
等僧使智璩至得書具至懷天台福地實爲勝
境所以敬爲智者建立伽藍法緣旣深尊師義
重欲使宗匠遺範奉而弗墜菩薩淨業久而彌
新然則去聖久遠學徒陵替規求利養不斷俗
緣滋味甘腴違犯戒律此乃增長罪垢豈謂福
田師等離有爲法求無上道棄俗諸漏鑑在雅
懷由須獎訓末學弘修淨行俾夫法門等侶咸

歸和合諸佛禁戒畢竟遵行又此寺嘉應事表
先覺旣理由冥感卽號國清寺并有施物用申
隨喜冬序甚寒道體清豫朕巡省風俗爰屆江
都瞻望山川載深勞想故遣兼通事舍人盧政
力往指此不多

衆謝啓附

天台山國清寺沙門智越一衆啓兼通事舍
人盧政力至奉宣十月二十九日勅云天慈
訓誨齊寺瑞名施物二千段米一千斛熏陸

香二斛千僧法齋度四十九人出家修治寺
宇卽集衆燒香宣唱仰惟聖治德合乾坤子
養萬邦安撫四海助佛教化度脫衆生光大
之恩誠無等等越等雖披法衣行不稱照乃
侍先師每垂宗範日夜克責無地啓處伏奉
勅旨頂戴受持但凡庸小劣不識菩薩大智
昔陳世之時親聞師說三國爲一有大力勢
人當爲造寺寺若立國土卽清必爲國清寺
于時車書未一不識何言自爾以來抱疑弗

曉奉勅賚寺國清之名還符本瑞山僧山民
載欣載喜始知諸願菩薩更相啓發或作五
品或統萬機光顯三尊利益國土慶此含情
幸聞休瑞仰瞻寺額卽如悟道但慈恩普被
日下同霑而天台一方偏感弘澤名衣上服
相次光臨妙物精糧前後降集越等三學無
功一餐難受況米物盈積豈可恭弘深懼不
堪慮延罪過庶藉慈宥展竭愚誠奉酬宸極
但天台幽遠自昔以來單權獨行今太平在

運國清寺立四十九人一日出家髮落障滅
實爲希有冀其心力增進學行日新念念功
熏奉資皇國又千僧結齋凡聖雲集日色華
朗僧徒欣戴仰惟先師妙德不可思議感應
神通必當鑑降午後對使人開發靈龕希有
聖瑞備是使人等公私道俗共見越等悲喜
交至謹以啓知謹啓

行道度人天下勅

大業三年正月二十八日菩薩戒弟子皇帝總
持稽首和南十方一切諸佛十方一切尊法十
方一切賢聖僧竊以妙靈不測感報之理遂通
因果相資機應之徒無爽是以初心爰發震動
波旬之宮一念所臻咫尺道場之地雖則聚沙
蓋鮮實履實於耆山水滴已微乃濫觴於法海
弟子階緣宿植嗣膺寶命臨御區宇寧濟蒼生
而德化弗弘刑罰未止萬方有罪寔當憂責百

雖不足用增塵累夙夜戰兢如臨淵谷是以歸
心種覺必冀慈愍謹於率土之內建立勝緣州
別請僧七日行道仍總度一千人出家以此功
德並爲一切上及有頂下至無間蜎飛蠕動預
稟識性無始惡業今生罪垢藉此善緣皆得清
淨三塗地獄六趣怨親同至菩提一時作佛

璽書

降來護兒璽書

公旋師之時是朕勅公之日君臣意合遠同符契梟此元惡期在不遙勒名太常非公而誰也

答突厥啓民盟書

續北未靜猶須征戰但使好心孝順何必改變衣服也

啓民上表附

已前聖人先帝莫緣可汗存在之日憐臣賜臣安義公主種種無少短臣種未爲聖人先帝憐養臣兄弟妬惡相共殺臣臣當時無處去向上看只見天下看只見地實憶聖人先帝言語授命去來聖人先帝見臣大憐臣死

命養活勝於往前遣臣作大可汗坐者也其
突厥百姓死者以外還聚作百姓也至尊今
還如聖人先帝提天下四方坐也還養活臣
及突厥百姓實無少短臣今憶想聖人及至
尊養活事具奏不可盡並至尊聖心裏在臣
心非是舊日邊地突厥可汗臣卽是至尊臣
民至尊憐臣時乞依大國服飾法用一同華
夏臣今率部落敢以上聞伏願天慈不違所
請

檄

遺陳尚書江總檄

南北雖殊風雲在望載懷虛遲寤寐爲勞獻歲
猶寒比當清豫匡贊乎國良亦慙懃寡人忝膺
朝寄董律專征跋涉山川今次江際公等文儒
自立器用適時冠蓋二世齒德兼重孔老殊教
名累異家金匱珠韜銀編玉策莫不膾炙舌抄
散在筆端邃古成敗之機近代安危之跡照同
懸鏡明若觀火無待指南自應神悟猶恐思之

未審差以毫厘聊煩翰墨畧申梗概自穹昊生
民樹之司牧義軒以降書契可紀咸一姓承立
四海無兩帝漢道云季三方鼎立時惟版蕩世
匪休明當塗起而蜀亾典午興而吳滅永嘉
喪亂紫宸曠主劉石符姚之僞僞夏僭燕之醜
妄摩大寶事乖圖錄魏室乘時兆基朔野經始
嵩洛未暇江湖有周受命敵非齊氏務在兼并
不遑外畧崑崙吳越自相君長竊擬王者之儀
妄談天子之氣偷安假息綿歷世祀我大隋之

肇開寶祚光有神州皇帝感曜魄之靈應太微
之座千年啓聖萬代一時深仁至德寧濟羣品
越海窮河東漸西被旄頭之屬歷代之霸作我
臣民削削服裝惟彼江表獨隔皇風夫物極則
反否終斯泰郭璞有云年經三百天下大同茲
實玄運已定於前聖主膺期而出欲以區區之
陳國違上天之冥數其不可存者一也大必包
小天地之常規明能通暗日月之常理論道德
以唐陶而征有苗語衆寡舉海內而當羣小在

長江舟楫之用矜其積習而山川共有我據上
游鼓棹之能吳楚不異高艫巨舫東西萬里扼
喉撫背水陸千途彼之兵士不過十萬首尾分
布所在危急加以屯戍邊方淹積歲序風雨以
爲擲沐蟣虱生於甲冑望我寬仁思倒戈戟通
在戎行更成敵國守以時月則魚爛土崩接以
鋒刃則鳥驚鹿走理在必然不假枚卜此不可
存者二也豐侯好酒實喪厥邦梁伯後民潰其
宗社彼之僞主覆車是鑒日夜沈湎曾無節度

繕造宮室莫知窮已竭四民之產荒縱其心歛
百姓之哀以爲已樂寶衣玉食填積後宮短褐
麤餼不克編戶一芥之善蔑爾無聞五子之歌
宛然悉備雖欲勿喪其可得乎此不可存者三
也僞主忌能護短酷法淫刑骨鯁之臣盡見疎
斥諫諍之士皆被屠害遐邇結舌衣冠解體人
妖鬼怪觸類呈灾稚齒耆年咸知殘滅此不可
存者四也以此小邦攝於大國邊烽夜動照彼
都城戍鼓晨嚴震其宮殿累基十二方此未危

懸縷千鈞比斯非切而莫知憂恐更自驕矜曾
無事大之心專行犯上之志侵軼我邊鄙招納
我叛亡國家爰自受命每從含養敦以鄰睦申
其聘好冀能守彼宗祊靜其疆域而長惡益甚
縱毒彌深吳會雄俊之人湘郢耿介之士乞師
請命盈庭滿闕帝乃憫然矜彼黎獻授鉞推轂
弔民伐罪已有別詔惟廢僞主之身自餘士庶
普從肆眚向所陳說咸是格言非曰游談共相
欺誤且劉叔納譙周之計而獲存孫皓用薛瑩

之詞而致福此二子者終有良臣之譽皆無陷
君之譏何則所耻者小所存者大若憲章往彥
聿遵前軌則爲主享封侯之業祖禰延血食之
期江東士民寔受其賜公等身保榮貴名垂竹
帛豈不美歟若膠柱不移守迷莫變率其蟻衆
敢拒王師軍有常刑悔無及矣禍成俄頃宜早
圖之使人今還遲有委曲言不盡意豈復多云
楊廣白

令

與天台山衆令

仁壽元年正月永嘉僧法曉生聞智者勝
德特至龕所旋繞千拜一夕龕戶自開光
照林木衆共瞻禮又張造者年邁足歷登
龕拜祝願得度脫忽聞龕中應聲及以彈
指灌頂等啓聞
皇太子與書

僧使灌頂智瓌至覽十一月三日書并陳靈龕
應迹顯形放光彈指流音應念傳響斯實不思
議力變化多方感悟有緣示希有事慎終追遠
感歎相深在昔雙林示滅非滅多寶獨塔俟時

涌現爰在狼迹迦葉分身乃至鷲山迦文留影
眉毫散彩指端震室豈非像教能度無邊是大
因緣聞善知識永惟宿昔獲承師範德音盈耳
神光在目方憑靈瑞係踵菩提肅承靈誥宣慰
南服山衆法徒同志爲友會成等侶方共舟航
歲暮凝寒念皆道勝天台名嶽海岍所推修建
大林多慙重閣三時設供四事不周想甘禪悅
以同法喜其間敬德信次相聞今遣員外散騎
侍郎張乾威送僧使還山于舊所設供庶同甘

露能變麝澁亦憑香積證道融銷書不盡言反

此無悉楊廣和南

僧使灌頂等所領今施物且仁壽元年十二月十七日

白石香爐一具并香合三枚大銅鐘一口鷄納裂袈一領瑪納褊袒二領四十九尺幡七口黃襪裙一腰氎二百領絲布祇支二領小幡一百口和香二合胡桃一籠衣物三百段奈紗一合石鹽一合酥六餅

天台山衆謝啓附

天台寺故智者弟子沙門智越一衆啓使者兼通事舍人張乾威至謹領前件物等並皆完淨仍卽陳羅先師舍利龕前具宣來令并

唱施物又千僧法齋伏惟弘護殷勤慈澤周
至香爐微妙天匠莊嚴洪鐘和雅震集凡聖
勝旛舒旆疑懸梵宮酥麪鹽桃請同香積法
衣淨飾無著離塵氎物豐多驚眩視聽千僧
雲集布滿山庭爰降王人光顯林谷奉對靈
龕必通神攝受標擬衆聖冀願海莊嚴越等
凡微謬當恩沐慈潤重沓難可克勝合衆虔
虔如履冰刃不任戴荷之至謹啓謝聞謹啓

仁壽二年
正月六日

重令

灌頂智瓔等至枉寺衆來請贈爲輕法門標
重檀波羅密般若尊成不具兩緣寧俱解脫施
受咸共忘言理至迹指寧復辭沸楊廣和南庶
子王弘宣令施天台物目 飛龍綾法衣一百
六十領幡一百五十張光明鹽一石酥五餅

天台山衆謝啓附

天台寺故智者弟子沙門智越一衆啓慈澤
隆重喜捨頻頻僧使後還復垂恩賚雜彩勝
幡莊嚴殿宇綾羅法服光洽衆僧猶酥五餅

克身去患光明一斛藥食兼濃越等山野糞
掃分衛今則被服溫華食味珍甘不自度量
彌增戰懼不任敬悚謹啓謝聞謹啓

仁壽二年四月

十五日

隋煬帝集卷之五

隋煬帝楊廣著

書

遺史祥書

煬帝初爲晉王祥從擊突厥於靈武破之
遷右衛將軍屯弘化備胡時帝在東宮遺
祥書

將軍總戎塞表胡虜清塵秣馬休兵猶事校獵
足使李廣慙勇魏尚媿能冠彼二賢獨在吾子
昔余濫舉推轂治兵振皇靈於塞外驅犬羊乎

大漠于時同行軍旅契濶戎旃望龍城而衝冠
眈狼居而發憤將軍英圖不世猛氣無前但物
不遂心傴僂從事每一思此我勞如何將軍宿
心素志早同膠漆久而敬之方成魚水近者臨
隨鑾駕言旋上京本卽述職南蕃宣條下國不
悟皇鑒曲發備位少陽戰戰兢兢如臨冰谷至
如建節邊境征伐四方褰帷作牧綏撫百姓上
稟成規下盡臣節是所願也是所甘心仰慕前
修庶得自效謬其入守神器元良萬國身輕負

重何以克堪所望故人匡其不逮比監國多暇
養疾閑宮厭北閣之端居罷南皮之馳射博望
之苑旣乏名賢飛蓋之園理垂終宴親朋遠矣
琴書寂然想望吾賢疹如疾首

史祥答太子書附

行人戾止奉所賜況恩紀綢繆形於文墨不
悟飛雪增冰之地忽載三陽毳幘韋韞之鄉
俄聞九奏精駭思越莫知啓處祥少不學師
旅長遇升平幸以先人緒餘備職宿衛懼駕

寒無致遠之用朽薄非折衝之材豈欲追蹤
古人語其優劣曩者王師薄伐天人受脤絕
漠揚旌威震海外當此之時猛將如雲謀夫
如雨至如祥者列於卒伍預聞指縱之規得
免逗遛之責循涯揣分實爲幸甚爰以情喻
雷陳事方劉葛信聖人之屈已非庸人之擬
議何則川澤之大汗潦攸歸松栢之高蔭蘿
斯託微心眷眷孟侯所知也仰惟體元良之
德煥重離之暉三善克修萬邦以正斯固道

高周誦契叶商皓豈在管蠡所能窺測伏承
監國多暇養德怡神咀嚼六經逍遙百氏追
西園之愛客眷南皮之出游疇昔之恩無忘
造次祥自忝式遏載罹寒暑身在邊隅情馳
魏闕每至清風夕起朗月孤照想鳴葭之啓
路思託乘於後車塞表京華山川悠遠瞻望
浮雲伏增潛結

遣延智顗書

帝晉王時爲揚州總管遣使奉迎師曰我
與晉王深緣契卽束衣順流不日而至
王請受菩薩戒顗謂王曰大王紆遵聖禁
可名總持王贊顗曰大師傳佛法燈宜稱
智者自後王諸書往來皆
稱弟子總持稱師爲智者

金風御節玉露調時道體休和安樂行不法師
抗志名山棲心慧定法門靜悅戒行熏修籍甚
徽猷久承音德欽風已積味道爲勞冀託舟航
用披雲霧故遣使人往彼延屈希能輕舉以沃
虛襟佇望來儀不乖眷意也弟子楊廣和南

治禪衆寺答智顓書

顓受戒旣畢出居城外禪衆
寺開皇十二年復還廬山

深具謙挹之旨但高人游處觸地是安然法宇
僧坊湏盡嚴正經云四事供養一不可虧已勅
有司修葺願忘懷受施也弟子楊廣和南

法諱奉智者誓

弟子總持和南柳願言還奉旨垂示六種捨施
及留受用弟子一日恭覲猶以陋薄不稱宿心
來旨旣以轉施功德彌爲增上悲敬福田深是
平等固非蔽識所能周見事事仰依其所留者
旣以不多願恒留受用故遣報諮謹和南

叅智者書

弟子總持和南履長戒辰在俗咸慶伏惟吐納
禪慧與時休和弟子稟受以來粗堪靜攝謹遣
叅承謹和南

請留智者書

開皇十一年十一月受晉王戒畢出居禪
衆寺卽欲西上王遣柳顓言致書請留待
來年一月約至棲霞送別又宣口勅云智
者爲當長去更有還期弟子意不欲相去
遼遠脫能旋迴不敢留停鎮下近山隨樂
住止又欲奉留待二月十八日同度延陵
鎮仍共至棲霞履行於彼送別十二年三
月顓將啓行王復致書請就攝山安居度
夏顓不許王命有司具
裝發遣顓遂至止廬山

弟子總持和南爰建來誨湏往荆楚辭致首尾
仰具高懷但祇稟淨戒事成甫爾宿昔凝滯匪
遑諮決闍黎和尚經稱勝田種子雖投嘉苗木

植方用心形永伸供養庶憑善誘日灑塵勞凡
厥共緣依止有地斯亦舟航兼運利益弘多如
來化導何必止還天竺菩薩應變本無定方深
願坦然以虛受物遲延展禮面當諮遜謹和南

重留智者書

弟子總持和南建吉須取明二日垂別修復未
周便深傾欻弟子前昨晝夜熟更惟付智者至
止以來未經一夏兼荆潭路遠安居將促江波
浩蕩行程難期旣去此處又不至前所半途結
夏按止亦難又按經律一夏供養安居僧福田
無量況乎師道及大衆力凡夫淺薄本資勝緣
菩薩大慈湏受應供暮春行謝首夏向臻九旬
忽違四事虛棄修心與理於情匪安今欲仰留

度夏發遣冀不半途飄落脫疑邑下喧湫湏依
林壑安居攝山亦當爲便若法歲將滿預勒蔣
州裝船南出石頭西游彌易旣乘爽節因得順
風去留之宜事理咸會此間彼處仰聽擇一意
不可盡辭豈多宣謹和南

三月一日

許智者行書

弟子總持和南復建今旨欲遂前心功德因緣
豈敢違忤謹遵宿願卽命所司發遣發日離晨
仰聽詳擇庶解夏非遠秋水乘流賜答來期必
當無爽用茲歡喜以蠲悲歎謹和南

謝法門書

弟子總持和南奉旨今日齋竟卽事登舟睽阻
方遙彌以傾欬垂示法相雖文旨淵蹟源本難
尋而教門方便開悟易益恭承善誘永以受持
庶藉津梁得無退轉自服膺至道每沾弘護將
事遵途復降良藥沐浴慈被伏用悽荷謹和南

遣使往匡山叅書

開皇十二年七月王遣書廬山叅省八座
顓往衡山營建功德十一月王遣書潭州
奉迎十二月至荆
州創立玉泉寺

弟子總持和南親信傳仲說還建去月朔告用
慰延結熱猶熾願道體休和仰承經過攝山鍾
岫寺塔安善徒衆和肅仍留二十僧權停開善
進至匡嶽結夏安居東林禪閣還爲一寺峰頂
精舍復皆隨喜敬緣勸發獲此熏修用耨身田
方流法雨金光明福喜荷彌深弟子去月十四

日始度朱方風土異宜流金在節攝衛多不調
適每有劣然二十九日來石頭稍已平復自江
浦違心馳情彭蠡以日爲歲無時暫忘願未解
夏前預整裝束法歲若滿卽事西浮彼間酬願
務令在促非但弟子蔽識希護周爰深恐禪慧
學徒咸思鑽仰宜尼在陳致嘆自衛便歸屈道
紆情事非爲已今遣主簿王灌指往祗承并貢
別牒用忘存省敢略繁辭謹和南

七月一日
法衣六件

一百斛米

一百斛

重遣匡山叅書

弟子總持和南東林山寺使至建八月八日誦
用慰馳結仰承已往衡山至當稍久法緣若竟
願卽沿流冀在歲陰必期展覲弟子渡江還去
月初移新住多有造次未善安立來旨勗以法
事實用慙悚始於所居外援建立慧日道場安
置照禪師以下江陵論法師亦已遠至於內援
建立法雲道場安置潭州覺禪師以下卽建深
善輒以諮知仰承相次爲營功德深荷扶助難

用遠陳而發此至江州遂下請僧料云何能得
相資前施鹽米其米迴入東林鹽以上路盈長
之外乃可別營功德今山僧返路行用仰酬尋
別遣使迎延願預整歸計江山遼賈豈盡誠曲

謹和南

十月十日

答智顓述匡山寺書

弟子總持和南垂誨述江州潯陽廬山東林寺
峰頂寺湏令弟子立爲檀越主山嶺盤秀下屬
江湖香爐層峰上虧雲日仙人之所欣止隱淪
於焉不歸況乎慧遠法師勝依結構謝客梁元
穿池重閣景師息心神應峰頂智者憩歷踵武
前賢師嚴道尊實深隨喜所恨寡薄無益將來
庶藉熏修方證常樂兼陳二寺偏近驛道行人
往來頗成混雜湏勅彼州令去公私使命不得

停止卽付所司依事頒下謹和南

三月一日

智顗述匡山寺書附

江州匡山東林寺者東晉鴈門慧遠法師之所創也遠是彌天釋道安之高足安是大和尚佛圖澄之弟子三德相承如日月星真佛法梁棟皆不可思議人也而遠內開半滿外善三玄德布遐方聲高霄漢初詣山足依止一林共耶舍禪師頭陀其下若說若默修西方觀未於林右建立伽藍因以爲名東林之

寺遠自創般若佛影二臺謝靈運穿鑿流地
三所梁孝元構造重閣莊嚴寺宇 日宛然

峯頂寺者是齊慧景禪師感山人延請因棲
其峰次梁慧歸在後登躡方建伽藍峰有水
泉忽然枯涸歸燒香祝願清流盈滿天降甘
露於泥洹日是以先德名蹤垂芳不斷松霞
清曠觸處蕭條公私往還莫不歸向自大化
江左貧道因至彼山憇泊東林時游峰頂以
歲爲日羨翫忘勞然山下伽藍偏近驛道行

人歸去頗成混雜今奉請爲兩寺檀越庶藉
影嚮衆得安心禮誦虔誠用酌洪澤并乞勒
彼所由永禁公私停泊沙門某敬白

與匡山三寺書

極暄法師道體何如衆內咸宜也鴈門遠法師
四依菩薩翻飛朔野棲息南山自斯以後名德
相繼智者見令爲寺檀越顧修寡薄非敢克當
獎導旣引良深隨喜敬摺此承問楊廣和南

三月二
十一日

與峰頂寺書

暮春暄和寺衆清勝禪悅法喜致足恬懷壚峰
香氣烟霞共遠智者經託勝地爲在總內令爲
檀越誠深隨喜更追厚愧善當敬勗楊廣和南

三月二
十一日

與禪閣寺書

春序將謝道體何如僧衆清善匡山佛事興自
慧遠法師法師師於彌天道安安師於佛圖澄
妙德相承莫之爲最江東龍藏悉本鴈門鴈門
上人創迹廬阜自梁及晉止有東林陳晚澆漓
別生禪閣僧徒好異豈稱至和智者爰居還湏
合一想均願海更無異味行人將送過指此相

聞楊廣和南

三月二十一日

入朝遣使叅書

弟子總持和南仰違移歲馳誠載勞兼事入朝
彌增延屬武關雖阻荆近於吳是以暫停陝州
遣使承接行人返命具奉覲縷非惟年尊疾動
又以結夏安居理事相推固湏停止弟子還鎮
非久便願沿流仰會江都庶應旦夕將聖德果
亦復差機因緣多端請不勞慮謹和南九月十日

又

弟子總持和南僧使智遂來奉五月二日誨用

慰馳結仰承衡嶽功德圓滿便致荆巫履涉虧
和深以傾悚弟子於江都入朝至陝關眩脅停
歧陽腹內又不調適去月末還京輦如欲相承
猶自羸薶未卽祇覲望雲延願珍納行人今返
辭豈宣具謹和南

又顏遣智遠奉書上玉泉伽藍圖并求南
衡神師碑因獻萬春剝皮袈裟王答書

弟子總持和南奉旨於荊州當陽縣境玉泉山
陞爲建造伽藍招提行道圖寫地形具以賜示
伏以布金徧地買園建立奉置三尊永流萬代

唱誦所不能讚筭數所不能量孰意輕微頓蒙
創造循復來旨爽然失厝旣事出神心理生望
表無容違拒苟作形迹卽具聞奏嘉號乃覃名
符天冠道場聲滿恒沙世界福報仰歸遜辭難
涉謹和南

又

弟子總持和南垂旨令撰衡嶽禪師碑文郭有
道之無愧辭高德逾此陸士衡之披文想質弟
子多慙旣蒙獎成不無剋勵邯鄲絕妙深恐難

工還鎮病瘳庶或勉強循覽行狀用難思議佛
澄道安寧復過是謹和南

又

弟子總持和南垂賜萬春樹皮袈裟一緣述是
梁武帝時外國惟獻四領今餘一而是建初烏
瓊法師所披謹尋菩薩戒稱所著袈裟皆染使
壞色況復自然嘉樹妙彩天成相應之言無勞
外假萬春表長生之稱二翼合善譬之辭未服
周旋恒充布薩常事半月豈惟元日著如來衣

深荷慈獎謹和南

又

弟子總持和南率施別牒五彩幡錦香爐檀等
十種示表微誠薄申法貺懃懃追悚謹和南
四寸九尺幡二張五色斑羅經巾二枚絹五十
疋錦香爐檀十張熏陸香二觔剃刀十口鷄納
袈裟一領油鐵鉢十口雄黃
十觔青須彌氈五領右牒